

31/08/1997

Jalur Gemilang berkibar megah

KUALA LUMPUR: Bendera Malaysia yang berkibar megah sejak 40 tahun lalu, kini diberi nama Jalur Gemilang.

Perdana Menteri, Datuk Seri Dr Mahathir Mohamad, mengumumkan nama bendera itu menjelang detik 12 malam tadi di hadapan puluhan ribu rakyat yang berhimpun di Dataran Merdeka di sini, sempena menyambut Hari Kemerdekaan ke-40.

Ketika mengumumkan nama bendera itu, Perdana Menteri membaca pengisytiharaan;

"Dengan detik yang bersejarah ini, saya dengan lafaz Bismillah mengisytiharkan nama bendera Malaysia, Jalur Gemilang."

Pengumuman itu turut disambut tepukan gemuruh dan laungan `merdeka' orang ramai yang membanjiri Dataran Merdeka sejak lewat petang semalam.

Sebelum itu, Perdana Menteri menerima bendera negara daripada peserta acara Larian Bendera, Larian Obor Patriotik dan Motothon.

Tepat 12 tengah malam, orang ramai melaungkan `Merdeka' sebanyak tiga kali dan bendera negara dikibarkan dengan iringan lagu Negaraku dan disusuli pertunjukan bunga api. Orang ramai turut dihiburkan dengan persembahan artis tempatan dan tarian.

Sebelum ini, Timbalan Menteri Penerangan, Datuk Suleiman Mohamed, berkata 42 nama dicadangkan, tetapi jawatankuasa yang dipengerusikan Ketua Setiausaha Negara, memilih Jalur Gemilang.

Beliau berkata, bendera Malaysia diberi nama khas bagi merangsang semangat dan kecintaan rakyat terhadap negara menjelang 40 tahun merdeka.

"Jika kerajaan Indonesia menamakan bendera kebangsaan mereka, Sang Saka Merah Putih, kerajaan Inggeris pula Union Jack, sewajarnya Malaysia juga mempunyai nama khas bagi bendera kebangsaan sendiri," katanya.

Sepanjang bulan ini, kempen kibar bendera turut diadakan di seluruh negara bagi meniup semangat patriotik dan cintakan negara di kalangan masyarakat. Selain mengibarkannya di rumah, orang ramai turut menghiasi kereta dengan bendera.

Sementara itu, beberapa orang yang berasak-asakan ketika menyaksikan persembahan di Dataran Merdeka tidak sedarkan diri dan terpaksa diberi rawatan kecemasan.

(END)